



Komunikado

20 di febrüari 2020

Cft: "Progreso stabil ta rekerí riba vários tereno"

Philipsburg – Kolegio di supervishon finansiero di Kòrsou i Sint Maarten ta pidi e gobièrnu interino enfátikamente pa realisá progreso riba vários tereno. E presupuesto 2020 mester keda aprobá mas lihé posibel. Ademas mester tuma medida pa kontrolá gastunan i mehorá kobransa di impuesto, pa hasi posibel pa por kompensá défisitnan anterior entrante aña 2021. Tambe ta importante pa mehorá e siklo di presupuesto i responsabilisashon i eliminá e retrasonan grandi den trahamentu i aprobamentu di kuentanan anual.

Ehekushon presupuesto 2019

A base di e di tres reportahe di ehekushon di 2019, Cft ta konstatá ku te ku sèptèmber 2019, Sint Maarten a realisá un défisit mas abou ku loke tabata presupuestá. Ta ferwagt ku aña 2019 lo sera ku un défisit di 47 mion florin, na lugá di e défisit presupuestá di 71 mion florin. Sinembargo lo keda ketu bai nesesario pa tuma mas medida pa por subi entrada i baha gastu ku e meta pa logra realisá surplus entrante 2021.

Konsepto di presupuesto 2020

Riba 22 di yanüari 2020 Cft a risibí e konsepto di presupuesto 2020 revisá. Esaki tin un défisit presupuestario di 25 mion florin i invershon di kapital di mas o ménos 62 mion florin. Cft a manda su reakshon riba e konsepto di presupuesto aki riba 5 di febrüari i a konsehá konseho di Minister di Sint Maarten pa no permití e proseso presupuestario di 2020 haña mas retraso, i pa yega awor lihé na un presupuesto aprobá.

En bista di e défisit presupuestario di 2019 i e défisit premirá pa 2020, Cft a papia ku e Minister di Finansa i Konseho di Minister tokante di e posishon di likides di Sint Maarten. Ta na benefisio di Sint Maarten pa kambia e défisit mas lihé posibel den un surplus struktural. Subimentu di entrada, en partikular entradanan di impuesto, ta inevitabel den e cuadro aki. Cft ta enfatisá ku restrukturashon di e servisio di impuesto mester tuma lugá rápidamente i medidanan pa redusí gastu mester keda implementá rápidamente.

Maneho finansiero

For di aña pasá Sint Maarten ta den posesion di un Plan di Mehora di Maneho Finansiero, kual a keda aprobá pa konseho di Minister. Sinembargo, niun mehora konkreto riba e tereno aki no a tuma lugá den e último tempu aki. Komo motibu a keda menshoná falta di kapasidat pa ehekutá i finansiamentu. Konsekuensia di e situashon aki ta ku e palabrashon ku Sint Maarten a traha ku e Kolegio pa yega na un deklarashon aprobatorio di akountent pa e kuenta final di 2021, lo rekerí un esfuerso adishonal konsiderabel. Cft a pidi e Minister di Finansa di Sint Maarten pa no sigui warda ku ehekushon di e plan.

Kuentanan anual

Sint Maarten a kontratá asistensia eksterno pa traha e kuentanan anual di 2017 i 2018. Sinembargo, e retraso den finalisashon di e trayekto di responsabilisashon di e añanan 2013 te ku 2018 ta keda. Durante di su bishita na Sint Maarten, Cft a enfatisá e nesidat pa pronto eliminá e retraso aki. Esaki ta rekerí akshon di tantu Gobièrnu komo Parlamento.

Progreso instrukshon

A base di e instrukshon di Konseho di Minister di Reino di 2015, Sint Maarten mester kompensá e défisitnan di pasado, eliminá retraso den pago i hasi e sistema di kuido i e sistema di penshon di behes



di e pais sostenibel. E défisitnan por keda kompensá solamente ora ku tin surplus riba e presupuesto. Den 2019 e retrasonan den pago a keda redusí ku mas o ménos 50 mion florin i ku vários kreditor a sera akuerdo. Sinembargo e sobrá retrasonan den pago ainda ta supstansial. Ainda no a manda e proyekto di lei pa reforma di e sistema di kuido pa Parlamento. Meskos ta e kaso pa e proyekto di lei pa subi e edat di penshon di behes di 62 pa 65 aña. E revishon di e lei di penshon pa ámtenar a keda presentá na Parlamento, pero ainda eski no a keda aprobá. E revishon aki ta enserá kambio di un sistema basá riba sueldo final pa un sistema di sueldo medio i subimentu di edat di penshon di 61 aña pa 65 aña.

Otro tópiko

Cft a keda informá ku e akuerdonan pa finansiamentu di e trabounan di rekonstrukshon na aeropuerto a keda firmá. Awor ta esensial pa dal e siguiente pasonan ku ta nesario pa yega na un aeropuerto ku ta funshoná bon i ku por kontribuí na mas rekuperashon ekonómiko.

Kolegio di supervishon finansiero Kòrsou i Sint Maarten a bishitá Sint Maarten di 17 pa 20 di febrüari i a reuní ku Gobernador, Minister di Finansa, Konseho di Minister, Representante interino di Hulanda na Sint Maarten, e órgano di ehekushon di Seguro Sosial di Kuido (SZV), Sint Maarten Medical Center (SMMC), St. Maarten Harbour Holding Company (SMHHC) i Princess Juliana International Airport (PJIA).

[Fin di komunikado]

Fotógrafo:

Edgardo Lynch

Teksto pa foto:

Ta na benefisio di Sint Maarten pa kambia e défisit mas lihé posibel den un surplus struktural.

Nota pa redakshon– no pa publikashon

Persona di kontakto na Cft:

Sekretariado Kolegio di supervishon finansiero

Ray Thuis - Sekretario

Telefon (+5999) 461-9081 / (+5999) 461-9082 / (+5999) 461-9084

Email info@cft.cw

Internet www.cft.cw

Persona di kontakto pa Prensa:

Jefka Martina

Telefon (+5999) 512-6861